



NEYTENDASTOFA

Ákvörðun nr. 32/2020

## Upplýsingar um þjónustuveitanda á vefsíðunni ísbúð Huppu

### I.

#### Málsmeðferð

##### 1.

Í júnímánuði 2020 gerði Neytendastofa könnun á sölustað og vefsíðum ísverslana. Snéri könnunin að því að skoða hvort verðskrá yfir þjónustuliði væri sýnileg á sölustað, sbr. ákvæði laga nr. 57/2005, um eftirlit með viðskiptaháttum og markaðssetningu, og hvort veittar væru upplýsingar um þjónustuveitanda, sbr. ákvæði laga nr. 30/2002, um rafræn viðskipti og aðra rafræna þjónustu, á vefsíðu.

Í bréfi Neytendastofu til Huppuíss ehf. dags. 30. júní 2020, var gerð grein fyrir því að könnun Neytendastofu á verðmerkingum í verslun Huppuís hafi leitt í ljós að verðmerkingar væru í samræmi við ákvæði laga nr. 57/2005 og reglna nr. 536/2011, um verðupplýsingar og einingaverð við sölu á vörum. Þá voru gerðar athugasemdir við að skoðun á vefsíðu Huppuíss, <https://is-is.facebook.com/isbudhuppu>, sýndi að á vefsíðunni vantaði upplýsingar um kennitölu, virðisaukaskattsnúmer, opinbera skráningu, og leyfi þjónustuveitanda. Í bréfinu var vísað til ákvæða 3., 5., 6. og 7. tölul. 1. mgr. 6. gr. laga nr. 30/2002 og þeim fyrirmælum beint til Huppuíss að koma upplýsingum á vefsíðunni í viðunandi horf. Að öðrum kosti mætti búast við að tekin yrði ákvörðun á grundvelli IX. kafla laga nr. 57/2005.

Ekkert svar barst.

##### 2.

Í bréfi Neytendastofu, dags. 24. ágúst 2020, kom fram að við skoðun stofnunarinnar á vefsíðunni <https://is-is.facebook.com/isbudhuppu> hafi komið í ljós að á vefsíðuna skorti enn upplýsingar um kennitölu, virðisaukaskattsnúmer, opinbera skrá og leyfi þjónustuveitanda. Því yrði ekki séð að Huppuís, hafi farið að fyrri fyrirmælum Neytendastofu.

Að nýju var þeim fyrirmælum beint til Huppuíss að koma upplýsingum á vefsíðunni í viðunandi horf að viðlögðum sektum.



Ekkert svar barst.

Skoðun Neytendastofu á vefsíðunni þann 10. september 2020 leiddi í ljós að viðeigandi umbætur höfðu ekki verið gerðar.

## II. Niðurstaða

### 1.

Í máli þessu hefur Neytendastofa gert kröfu um að Huppuís ehf. geri viðunandi lagfæringar á vefsíðunni <https://is-is.facebook.com/isbudhuppu>. Á vefsíðunni er ekki að finna fullnægjandi upplýsingar um þjónustuveitanda, þar sem upplýsingar skortir um kennitölu, virðisaukaskattsnúmer, opinbera skrá og leyfi þjónustuveitanda, sbr. 3., 5., 6. og 7. tölul. 1. mgr. 6. gr. laga nr. 30/2002, um rafræn viðskipti og aðra rafræna þjónustu.

Engin svör hafa borist frá Huppuís vegna málsins og engar lagfæringar hafa verið gerðar á vefsíðunni.

Samkvæmt 1. mgr. 6. gr. laga nr. 30/2002 skal þjónustuveitandi veita greiðan og samfelldan aðgang að eftirfarandi upplýsingum um sig:

1. nafni,
2. heimilisfangi þar sem hann hefur staðfestu,
3. kennitölu,
4. póstfangi, netfangi og öðrum þeim upplýsingum sem gera mögulegt að hafa samband við hann á greiðan hátt,
5. virðisaukaskattsnúmeri þjónustuveitanda,
6. þeirri opinberu skrá sem hann er skráður hjá, svo sem hlutafélagaskrá, samvinnufélagaskrá eða firmaskrá, og
7. leyfi og eftirlitsaðila ef starfsemi hans er háð leyfum.“

### 2.

Huppuís hefur brotið gegn ákvæðum 3., 5., 6. og 7. tölul. 1. mgr. 6. gr. laga nr. 30/2002 með ófullnægjandi upplýsingagjöf um þjónustuveitanda á vefsíðunni <https://is-is.facebook.com/isbudhuppu>.

Samkvæmt 19. gr. laga nr. 30/2002 er Neytendastofu falið eftirlit með að farið sé að ákvæðum 6.-7. gr. og 9.-11. gr. laganna. Sé brotið gegn nefndum ákvæðum gilda ákvæði laga nr. 57/2005 um úrræði Neytendastofu, stjórnvaldssektir og málsmeðferð.



Með vísan til 2. mgr. 21. gr. c. laga nr. 57/2005 beinir Neytendastofa þeim fyrirmælum til Huppuíss að koma upplýsingum um þjónustuveitanda á vefsíðu sinni, <https://is-is.facebook.com/isbudhuppu>, í rétt horf innan tveggja vikna frá dagsetningu ákvörðunar þessarar. Verði það ekki gert skal Huppuís greiða dagsektir í samræmi við 23. gr. laga nr. 57/2005 að fjárhæð 20.000 kr. (tuttugu þúsund krónur) á dag þar til farið hefur verið að ákvörðun Neytendastofu. Sektarfjárhæðin er ákveðin með mið af meðalhófsreglu stjórnarsýslulaga, umfangs brotsins og fjárhæðum dagsekta í öðrum ákvörðunum Neytendastofu.

### III.

#### Ákvörðunarorð:

**„Huppuís ehf., Álfheimum 4, 105 Reykjavík, hefur með því að veita ekki upplýsingar um kennitölu, virðisaukaskattsnúmer, opinbera skrá og leyfi þjónustuveitanda, á vefsíðunni <https://is-is.facebook.com/isbudhuppu> brotið gegn ákvæðum 3., 5., 6., og 7. tölul. 1. mgr. 6. gr. laga nr. 30/2002, um rafræn viðskipti og aðra rafræna þjónustu.**

**Huppuís ehf. skal innan tveggja vikna frá dagsetningu þessarar ákvörðunar gera viðeigandi úrbætur á vefsíðunni <https://is-is.facebook.com/isbudhuppu>. Verði það ekki gert innan tilskilins tíma skal félagið greiða dagsektir að fjárhæð 20.000 kr. (tuttugu þúsund krónur) á dag þar til farið hefur verið að ákvörðun Neytendastofu.“**

Neytendastofa, 10. september 2020.

Þórunn Anna Árnadóttir  
forstjóri

Matthildur Sveinsdóttir